

O AI O LOO FAIA LE FINAGALO O IEOVA I ASO NEI?



O AI I MATOU?

Lesona 1-4

E silia i le 239 atunuu o loo iai Molimau a leova, ma e mai i ituaiga uma ma aganuu eseese. O le ā ua mafai ai ona autasia leni vaega eseese o tagata? O ā ituaiga tagata e iai Molimau a leova?



A MATOU GALUEGA

Lesona 5-14

Ua lauiloa la matou galuega tala'i. E matou te faapopototo faatasi fo'i i o matou Maota mo Sauniga e su'esu'e ai le Tusi Paia ma tapua'i. E faape'i sauniga o loo faia i na nofoaga, ma o ai e ono auai ai?



LA MATOU FAALAPOTOPOTOGA

Lesona 15-28

E lē o se faalapotopotoga o tapua'iga e sa'ili ai ni tupe, ae o se faalapotopotoga faavaomalo o tagata o ē ua lotomalilie e auauna atu i le Atua. Ua faapefea ona faatulaga, faatonutonu ma faatupeina? Po o faia moni lava e la matou faalapotopotoga le finagalo o leova i aso nei?



E lē faatauina leni tusi. Ua saunia e a'oa'oina ai le Tusi Paia i le lalolagi aoao, ma ua lagolagoina e ala i foa'i tauofo.

Mo le faia o foa'i tauofo, taga'i i le www.jw.org.

Se'i vaganā ua faailoa atu, ae o mau uma o loo i leni tusi ua sii mai i le faaliliuga

O le Tusi Paia—O le Faaliliuga a le Lalolagi Fou.

O Ai o Loo Faia le Finagalo o leova i Aso Nei?

Who Are Doing Jehovah's Will Today?

Lomia ia Fepuari 2016

Samoan (*jl-SM*)

© 2012, 2014

WATCH TOWER BIBLE AND TRACT SOCIETY OF PENNSYLVANIA

O É Lomia

Watchtower Bible and Tract Society of New York, Inc.

Wallkill, New York, U.S.A.

Made in Japan

Lomia i Iapani

LE AUALA E FAAAOGĀ AI LENEI POLOSIUA

Faaalu ni nai minute i vaiaso ta'itasi e iloilo ai se lesona o lesona o loo mulimuli mai, ma tali fesili e autalu ai. E lē gata i lea, e pei ona iai i le pusa “Sa'ili'ili Atili,” taumafai e faamasani ma iloa lelei i matou o ni tagata o le Atua, iloa a matou galuega o loo fai, ma iloa le auala e faagaoioi ai mea i la matou faalapotopotoga.





O le ā le Finagalo o le Atua?

E finagalo le Atua ia tatou ola filemu ma fiafia e faavavau i se lalolagi parataiso!

Ae atonu e te taumānatu e faapea, ‘Pe e mafai faapefea ona tupu lenā mea?’ O loo ta’ua i le Tusi Paia o le a faataunuuina e le Malo o le Atua, ma o lona finagalo ia a’oa’o tagata uma e uiga i lenā Malo ma lona finagalo mo i tatou.—Salamo 37:11, 29; Isaia 9:7.

E finagalo le Atua ia tatou maua aogā.

E pei lava ona mana’o se tamā alofa mo le mea e sili ona lelei mo lana fanau, e finagalo fo’i lo tatou Tamā i le lagi ia tatou olioli i le fiafiaga e faavavau. (Isaia 48:17, 18) Na ia folafola mai e faapea “o lē e faia le finagalo o le Atua e tumau e faavavau.”—1 Ioane 2:17.

E finagalo le Atua ia tatou savavali i ona ala.

O loo ta’ua i le Tusi Paia e finagalo Lē na faia i tatou ia “a’oa’oina . . . i tatou i ona ala,” ina ia mafai ona tatou “savavali ai i ona ala.” (Isaia 2:2, 3) Ua ia faamaopoopoina “ni tagata mo lona suafa” ina ia faauluiloa atu lona finagalo i le lalolagi atoa.—Galuega 15:14.

E finagalo le Atua ia tatou autasi i le tapua’iga iā te ia.

Nai lo o le fevaevaea’i o tagata, o le tapua’iga mamā a leova ua autasia ai i latou uma i le alofa moni. (Ioane 13:35) O ai i aso nei o loo latou a’oa’oina tane ma fafine i so o se mea i le auala e auauna atu ai i le Atua i le autasi? E matou te valaaulia oe ia sa’ili le tali e ala i lenei polosiua.

SA’ILI’ILI ATILI

Su’esu’e le Tusi Paia ma i matou.

Pe ua e su’esu’eina le Tusi Paia faatasi ma Molimau a leova? Pe afai e leai, pe e te mana’o e fai sau su’esu’ega faale-Tusi Paia? E lē totogiina. O le a e iloa ai o se auala lelei lea mo oe e mafuta vavalalata atu ai i le Atua.

Maua lomiga e aunoa ma se to-togi.

E mafai ona e asiasi atu i se Maota mo Sauniga pe talanoa atu i se Molimau a leova, ma fesili mo se lomiga i so o se gagana, lea e mafai ona fesoa-soani iā te oe e malamalama ai i le Tusi Paia.

E maua faamatalaga e uiga iā i matou i le initaneti.

Taga’i i le Upega tafa’ilagi aloaia a Molimau a leova. O le a mafai ai ona e faitau i le Tusi Paia, ma atonu e maimoa pe fai ni kopi o le tele o a matou lomiga i le silia i le 750 gagana.

www.jw.org





Tenemaka



Taiwan



Venezuela



Initia

O ā Ituaiga Tagata e lai Molimau a leova?

E to'afia ni Molimau a leova e te silafiaina? O nisi o i matou atonu o ni ou tuaoi, faigaluega pe a'o'oga faatasi. Pe atonu fo'i na matou faia muamua se talanoaga faale-Tusi Paia faatasi ma oe. O ai moni lava i matou, ma aiseā e matou te faa-soa atu ai i le lautele o matou talitonuga?

O i matou o tagata e pei fo'i o outou. E eseese o matou talaaga ma tulaga. O nisi o i matou na auai muamua i nisi lotu, a o nisi e le'i talitonu i le Atua. Peita'i, a o le'i avea ma Molimau a leova, sa matou faaaluina le tele o le taimi e su'e-su'e mǎe'ae'a ai a'oa'oga a le Tusi Paia. (Galuega 17:11) Na matou ioeina mea na a'oa'oina ma faia loa se filifiliga e tapu-a'i atu iā leova le Atua.

Ua matou maua aogā mai le su'esu'eina o le Tusi Paia. I le pei o le to'atele, e ao ona matou taulimaina o matou lava faafitauli ma vaivaiga. Ae o le taumafai e faatatau mataupu silisili o le Tusi Paia i o matou olaga i aso uma, ua matou tofo ai i suiga mata'ina i o matou olaga. (Salamo 128:1, 2) O se tasi lea o mǎfuaaga e matou te faa-soa atu ai i isi mea lelei ua matou a'oa'oina mai le Tusi Paia.

E matou te ola e tusa ai ma tapulaa a le Atua. O nei tapulaa e pei ona a'oa'oina i le Tusi Paia, e fesoasoani mo lo matou lelei ma faaalai ai le faaaloalo i isi, faapea uiga e pei o le faamaoni ma le agalelei. E fesoasoani nei tapulaa i le aga'iga'i i luma ma le mauaina o ni olaga lelei o tagata lautele, ma faalaeiau le autasi ma amioga mamā i le aiga. Talu ai ua matou talitonu “e lē faailogaina tagata e le Atua,” ua matou auai ai i se aiga faavaomalo o se 'auuso faaleagaga, e sa'oloto mai i le faailoga tagata ma faiga faapolotiki. E ui lava o i matou o tagata e pei fo'i o isi, ae o i matou o ni tagata e mata'ina i le vaiga a isi. —Galuega 4:13; 10:34, 35.

- O le ā le mea e tutusa ai Molimau a leova ma isi tagata?
- O ā tapulaa ua a'oa'oina e Molimau a leova mai i le Tusi Paia?

Aiseā ua Ta'ua ai i Matou o Molimau a leova?


E manatu le to'atele o Molimau a leova o le igoa o se tapu-a'iga fou. Peita'i, i le silia ma le 2,700 tausaga ua mavae, na ta'ua ai auauna a le Atua moni e to'atasi o ana "molimau." (Isaia 43:10-12) E oo mai i le tausaga 1931, sa iloa i matou o Tagata A'oga o le Tusi Paia. Aiseā ua suia ai lo matou igoa i Molimau a leova?

E iloa ai lo matou Atua. E tusa ai ma faamaumauga i manuskulipi mai anamua, e silia i le fitu afe taimi o loo ta'ua ai i le Tusi Paia le suafa o le Atua, o leova. O le tele o faaliliuga ua suia ai lenei igoa i faalupega e pei o le Alii po o le Atua. Peita'i, na faailoa atu e le Atua moni lona lava suafa o leova iā Mose, i lona fetalai atu: "O lo'u igoa lenā e faavavau." (Esoto 3:15) O lenei auala na faaesea ai e le Atua o ia lava mai i atua sesē uma. E matou te mitamita e tauave le suafa paia o le Atua.

E faamatala ai la matou galuega. Na amata mai lava i aso anamua i le tagata amiotonu o Apelu, se faasologa umi o tagata sa avatu se molimau e faatatau i lo latou faatuatua iā leova. A o faagasolo le tele o senituri, sa auaufaatasi atu Noa, Aperaaamo, Sara, Mose, Tavita ma isi i lenei "vaega e to'atele o molimau." (Eperu 11:4-12:1) E pei lava ona avatu e se tagata se molimau i le faamasinoga mo se tagata e le'i faia se solitulafono, e matou te maumaua'i fo'i e faailoa atu le upu moni e faatatau i lo matou Atua.

Ua matou faa'oa'o iā Iesu. Ua ta'ua i le Tusi Paia Iesu "o le molimau faamaoni ma moni." (Faaaliga 3:14) Na ta'ua e Iesu sa ia 'faailoa atu le suafa o le Atua,' ma 'molimau atu pea i le upu moni' e faatatau i le Atua. (Ioane 17:26; 18:37) O lea la, e tatau fo'i i soo moni o Keriso ona latou molimau ma faailoa atu le suafa o leova. O loo faaauau pea ona faia e Molimau a leova lenā galuega.

- Aiseā na suia ai le igoa o Tagata A'oga o le Tusi Paia i le ta'u Molimau a leova?
- O le ā le umi talu ona iai Molimau a leova i le lalolagi?
- O ai le Molimau sili a leova?



Noa

Aperaaamo
ma Sara

Mose

Iesu Keriso

SA'ILI'ILI ATILI

Pe a e feiloa'i i tagata o la matou faapotopotoga i lou vaipanoa, taumafai e faamasani ma iloa lelei i latou. Ia fesili atu i ai: "Aiseā na avea ai oe ma Molimau a leova?"





Tagata A'oga o le Tusi Paia,
i vaitausaga o le 1870



Lomiga muamua o le *Watchtower*, 1879



Le Olomatamata i aso nei

Na Faapefea Ona Toe Faafo'isia A'oa'oga Moni o le Tusi Paia?

Na valoia mai i le Tusi Paia pe a mavae le maliu o Iesu, o le a ō mai a'oa'oga pepelo mai ulua'i Kerisiano ma faauiga sesē a'oa'oga moni o le Tusi Paia. (Galuega 20:29, 30) Ma o le mea tonu lava lenā na tupu. Ua latou faafilogia a'oa'oga a Iesu ma manatu o lotu faapaupau, ma na i'u ina mapuna a'e ai Kerisiano taufaasesē. (2 Timoteo 4:3, 4) E faapefea ona matou mautinoa o loo iā i matou le malamalamaga sa'o i mea *moni* o loo a'oa'oina i le Tusi Paia i aso nei?

Ua oo i le taimi a leova e faailoa ai le upu moni. Na ia valoia, 'i le taimi o le i'uga, o le a faatuputeleina ai le poto sa'o.' (Tanielu 12:4) I le tausaga e 1870, na mātaulia ai e se vaega to'aititiiti o tagata o loo sa'ili i le upu moni, le anoanoa'i o a'oa'oga a lotu e lē faale-Tusi Paia. O lea, na amata ai ona latou sa'ilia se malamalamaga e uiga i ulua'i a'oa'oga o le Tusi Paia, ma na faamanuia e leova i latou i le malamalama faaleagaga.

Na su'esu'e mae'ae'a e tane faamaoni le Tusi Paia. O na Tagata A'oga faamaoni o le Tusi Paia, o ē na muamua iā i matou, na latou amataina se auala fou o le faia o su'esu'ega, lea o loo matou faaogāina pea e oo mai i aso nei. Na latou talanoaina faasolosolo mataupu o le Tusi Paia. Afai na latou maua se vaega o le Tusi Paia e faigatā ona malamalama i ai, ona latou sa'ili lea o isi fuaiupu e faamatala mai ai. Pe a latou iloa ua fetauilelei lenā manatu ma le isi vaega o le Tusi Paia, ona latou tusia lea i lalo. E ala i le tuu atu e faamatala mai e le Tusi Paia lava ia, na latou toe faafo'i ai le upu moni e uiga i le suafa o le Atua ma le Malo, lona finagalo mo le fanau a tagata ma le lalolagi, le tulaga o ē ua maliliu, ma le faamoemoe o le toetū. O a latou sa'ili'iliga ua faasa'oloto mai ai i latou i le tele o talitonuga ma faiga taufaasesē.—Ioane 8:31, 32.

E oo ane i le 1879, ua manatu Tagata A'oga o le Tusi Paia ua oo i le taimi e faalauiloa ai i le lalolagi aoao le upu moni. O lea, mai i lenā tausaga, na amata ai loa ona lolomiina le mekasini o loo matou faasalalauina atu i aso nei, *Le Olomatamata Faasilasilaina le Malo o leova*. I le taimi nei, ua matou faailoa atu a'oa'oga moni o le Tusi Paia i tagata mai i atunuu e 240 i le silia ma le 750 gagana. E le'i iai lava se taimi muamua na matuā faatupula'ia ai le poto sa'o!

- Ina ua mavae le maliu o Keriso, o le ā na tupu i le upu moni o le Tusi Paia?
- O le ā na mafai ai ona matou toe faafo'isia mai le upu moni mai i le Afioga a le Atua?

Aiseā ua Matou Saunia ai le Faaliliuga a le Lalolagi Fou?

I le tele o tausaga, na faaaogā, lolomiina ma tufatufaina ai e Molimau a leova faaliliuga eseese o le Tusi Paia. Peita’i, na matou iloa ua mana’omia se lomiga fou e sili atu ona lelei e fesoasoani i tagata e a’oa’oina ai le “poto sa’o i le upu moni,” ona o le finagalo lenā o le Atua mo tagata uma. (1 Timoteo 2:3, 4) O lea, i le 1950, na amata ai ona matou tatala ni vaega o le Tusi Paia o loo faaaogā ai le gagana o aso nei, le *New World Translation* i le faa-Peretania. Ua faaliliuina ma le faamaoni ma le sa’o lenei Tusi Paia i le sili atu i le 130 gagana.

Sa mana’omia se Tusi Paia e faigofie ona malamalama i ai.

E fesuisuia’i gagana a o faagasolo taimi, ma o loo iai i le tele o faaliliuga faaupuga e lē o toe faaaogāina ma e faigatā ona malamalama i ai. E lē gata i lea, ua maua nisi manusikulipi anamua e sa’o lelei ma e talitutusa ma ulua’i manusikulipi, ma ua i’u ai i se malamalamaga e sili atu o Tusitusiga Eperu, Aramaika, ma Eleni.

Sa mana’omia se faaliliuga e faamaoni atu i afioga a le Atua.

Nai lo o le sa’oloto e suia tusitusiga faagaeina a le Atua, e tatau i tagata faaliliu o le Tusi Paia ona faamaoni i ulua’i tusitusiga. Peita’i i le tele o faaliliuga, e lē o faaaogāina ai i Tusitusiga Paia le suafa o le Atua, o leova.

Sa mana’omia se Tusi Paia e viia ai Lē na tusiaina.


(2 Samuelu 23:2) E pei ona faaāta mai iinei, i le *Faaliliuga a le Lalolagi Fou*, ua toe faafo’isia ai le suafa o leova lea e tusa ma le 7,000 taimi e alia’i mai ai i manusikulipi tuai o le Tusi Paia e pei ona faata’ita’i mai i le faaa’oa’oga i loo ta’ua i lalo. (Salamo 83:18) O i’uga o tausaga e tele na faia ai ni iloiloga filigā, ua tatou fiafia ai e faitau lenei Tusi Paia a o faailoa manino mai ai manatu o le Atua. E tusa pe e lē o maua le *Faaliliuga a le Lalolagi Fou* i lau gagana, e matou te faalaeiauina oe e atia’e se masaniga lelei o le faitauina o le Afioga a leova i aso ta’itasi.—Iosua 1:8; Salamo 1:2, 3.

- Aiseā na matou filifili ai ua mana’omia se faaliliuga fou o le Tusi Paia?
- O le ā le masaniga i aso ta’itasi e lelei mo so o se tasi o loo naunau e a’oa’oina le finagalo o le Atua?

O loo iai i fasi manusikulipi o le Symmachus le suafa o le Atua i le Salamo 69:31, i le senituri lona tolu po o le fā T.A.



Congo (Kinshasa)



Rwanda

SA’ILI’ILI ATILI

Faitau upu tomua o le *Faaliliuga a le Lalolagi Fou*, ma tali le fesili: “O le ā le māfuaaga na manatu ai le komiti faaliliu ua tatau ona saunia lenei Tusi Paia?” Ona faatusatusa lea o manatu i fuaiupu o loo mulimuli mai i isi lomiga atonu o loo iā te oe: Kenese 25:29; Isaia 14:23; Mataio 5:3; 11:12; 1 Korinito 10:24, 25; Filipi 1:8.



O ā Mea o le a E Mauaina Mai i a Matou Sauniga Faa-Kerisiano?

E to‘atele tagata ua lē o toe auai i ni sauniga faalotu, ona e latou te lē o mauaina mai ai ni ta‘iala po o ni faamāfanafanaga faaleagaga. Aiseā la e tatau ai ona e auai i sauniga faa-Kerisiano a Molimau a leova? O ā mea o le a e mauaina mai ai?

Olioli faatasi ma tagata e alolofa ma manatu mamafa. I le ulua‘i senituri, sa faamaopoopo ai Kerisiano i faapotopotoga, ma na latou faia sauniga e tapua‘i ai i le Atua, su‘esu‘e le Tusi Paia, ma faalaeiau le tasi i le isi. (Eperu 10:24, 25) O le faa-tasitasi i se si‘omaga alofa, e latou te lagonaina ai o loo latou miomiō faatasi ma uō moni—o o latou uso ma tuafāfine faaleagaga. (2 Tesalonia 1:3; 3 Ioane 14) O loo matou mulimuli pea i na faatulagaga ma maua ai le olioli lava lenā e tasi.

Le aogā o le a‘oa‘oina o le auala e faatatau ai mataupu silisili o le Tusi Paia. E pei lava ona sa faia i taimi o le Tusi Paia, sa faapotopoto faatasi tane, fafine ma tamaiti. E faaaogā e faia‘oga agavaa le Tusi Paia e fesoasoani iā i matou, ia iloa le auala e faatatau ai mataupu silisili i o matou olaga i aso ta‘itasi. (Teuteronome 31:12; Neemia 8:8) E mafai ona fai se sao o tagata uma i le aofia i talanoaga, le usuina o pese, ma maua le avanoa e faailoa atu ai lo matou faamoemoe faa-Kerisiano. —Eperu 10:23.

Le faamanuiaga o le faamalosia o lou faatuatua i le Atua. I aso o le aposetolo o Paulo, na ia ta‘u atu ai i se tasi o faapotopotoga e faapea: “Ua ou matuā naunau lava e fia feiloa‘i ma outou, . . . ma ia tatou fefaalaeiaua‘i ai i le faatuatua, o outou atoa ma a‘u.” (Roma 1:11, 12) I a matou sauniga, e matou te feiloa‘i ai e lē aunoa ma o matou uso talitonu, e faamalosia ai lo matou faatuatua ma le naunau e ola i se olaga faa-Kerisiano.

Aiseā e te lē taliaina ai lenei valaaulia e auai i le isi a matou sauniga e sosoo ai, ma e iloa ai le moni o nei mea? E talia ma le māfana oe. E lē totogiina nei sauniga, ma e lē aoina ai fo‘i ni peleti.

- O le ā le faaa‘oa‘oga o loo mulimuli ai a matou sauniga?
- E faapefea ona matou maua aogā i le auai i sauniga faa-Kerisiano?

Anitenitina

Sierra Leone

Peleseuma

SA‘ILI‘ILI ATILI

Afai e te fia maimoa i totonu o le Maota mo Sauniga a o e le‘i auai i se tasi o a matou sauniga, ia talosaga atu i se Molimau a leova e ave oe i inā ma faamatamata ai.



Meleisia

O ā Aogā e Matou te Maua i le Auaufaatasi ma Uso Kerisiano?


E tusa pe tauasa ma ui atu i totonu o vaomatua, pe e matuā leaga fo’i le tau, ae e matou te auai pea i a matou sauniga faa-Kerisiano. Po o ā lava lu’i o le olaga e fesaga’ia pe e vaivai fo’i i le mǎe’a ai o galuega o le aso, ae aiseā e taumafai ai lava Molimau a leova e faatasitasi ma o latou uso talitonu?

E mo lo matou lelei. Na tusi Paulo e uiga i ē o loo matou auauamea i le faapotopotoga, ‘la manatunatu fo’i le tasi i le isi.’ (Eperu 10:24) O le uiga o lenei faaupuga “ia manatunatu ma le faaeteete,” o le iloa lelei lea e le tasi o le isi. O loo faalaeiau la i tatou i upu a le aposetolo ia manatu mamafa e uiga i isi. E ala i le faamasani atu i isi aiga Kerisiano, e matou te iloa ai nisi o i latou sa taulau manuia i le onosaia o lu’i e talitutusa ma lu’i o loo matou fesaga’ia, ma e fesoasoani iā i matou e taulau manuia ai fo’i.

E atia’e ai faauōga tumau. I a matou sauniga, e matou te faapotopoto faatasi ai, e lē tau ina ia feiloa’i, ae o se faatasiga ma uō vavalalata. O nisi taimi, e matou te faatasitasi ai mo ni nai faafiagiaga ma faiga mǎlōlōga e aogā. O ā aafiaga aogā e maua mai i nei faatasiga? E matou te a’oa’oina ai le talisapaia e le tasi o le isi, ma faamalosia ai la matou fusi o le alofa. O lea, pe afai e fesaga’ia e o matou uso faafitauli, e matou te nofosauni e fesoasoani atu iā i latou, talu ai ua iai ni a matou faauōga māfana. (Faataoto 17:17) E ala i le auauamea faatasi ma isi sui uma o le faapotopotoga, e faaalua ai o loo matou ‘fetausia’i i o matou itutino.’—1 Korinito 12:25, 26.

E matou te faalaeiauina oe e filifili ia avea i latou o loo faia le finagalo o le Atua ma au uō. O le a e maua na ituaiga uō i Molimau a leova. Faamolemole, ia aua ne’i iai se mea e taofia ai oe mai le auaufaatasi ma i matou.

- Aiseā e tāua ai ona matou faatasitasi i sauniga?
- O afea o le a e taumafai e iloa lelei ai la matou faapotopotoga?



Malakasa



Nouē



Lepanona



Italia



Niu Sila



Iapani



Uganda



Lithuania

SA'ILI'ILI ATILI

Iloilo nisi o mataupu o le a talanoaina i isi sauniga e sosoo mai. Mātau nisi o mea o le a mafai ona e a'oa'oina mai i le Tusi Paia e aogā i lou olaga i aso ta'itasi.



E Faape'i a Matou Sauniga?

I sauniga a ulua'i Kerisiano, sa usuina ai pese, fai tatalo, faitau ma iloilo mau o le Tusi Paia, e aunoa ma ni tū masani faalotu. (1 Korinito 14:26) E te faatalitalia la se mea e talitutusa faapena i a matou sauniga.

O faatonuga e faavae mai i le Tusi Paia ma e aogā. I faai'uga o vaiaso, e feiloa'i ai faapotopotoga ta'itasi e faalogologo i se **lauga faale-Tusi Paia** e 30 minute, e iloa ai pe faapefea ona fesoota'i le Tusi Paia i o matou olaga ma le taimi o loo tatou ola ai. E faalaeiauina i matou uma ia mulimuli i a matou Tusi Paia a o faagasolo le lauga. Pe a mǎe'a le lauga, e tasi le itula e faalu mo le **Su'esu'ega o le "Oloamatamata,"** lea e valaaulia ai sui uma o le faapotopotoga e fai se sao a o talanoaina le mataupu mai le lomiga o *Le Oloamatamata* mo su'esu'ega. E fesoasoani lenei talanoaga iā i matou ina ia faatatauina i o matou olaga le ta'ita'iga mai i le Tusi Paia. O loo su'esu'eina fo'i le mataupu lava lea e tasi i le silia i le 110,000 isi faapotopotoga i le lalolagi aoao.

E fesoasoani iā i matou e faaleleia ai o matou tomai e a'oa'oa atu. E iai fo'i le sauniga amata o le vaiaso e tolu ona vaega e ta'ua o **La Tatou Faiva ma le Olaga Faa-Kerisiano**, lea e faavae mai i mataupu mai i *La Tatou Faiva ma le Olaga Faa-Kerisiano* —*Polokalame mo le Sauniga*, lea e maua i masina ta'itasi. O le vaega muamua o lenei sauniga e ta'ua o le, 'Oa Tautele Mai i le Afioga a le Atua, e fesoasoani iā i matou ina ia faamasani ai i se vaega o le faitauga Tusi Paia ua mǎe'a ona faitauina e le faapotopotoga. O le isi vaega o le sauniga e ta'ua o le Toleniga mo le Faiva i le Fanua, e aofia ai faata'ita'iga i le auala e faaogā ai le Tusi Paia e faia ai talanoaga ma isi. E aumai e se faia'oga faufautua ni fautuaga, ina ia faaleleia atili ai o matou tomai o le faitau ma le tautala. (1 Timoteo 4:13) O le vaega mulimuli o le sauniga e ta'ua o le, Auala e Ola ai o se Kerisiano, e iloiloaina ai faatatau aogā o mataupu silisili o le Tusi Paia i le olaga i aso fai soo. E aofia ai i lenei vaega se talanoaga e faafesili ma tali, lea e faalolotoina ai lo tatou malamalama i le Tusi Paia.

Pe a e auai i a matou sauniga, e mautinoa o le a e maofa i le maualuga o le tulaga taua'oa'oga faale-Tusi Paia o le a e mauaina.—Isaia 54:13.

- O le ā e te faatalitalia o le a e faalogologo i ai i sauniga a Molimau a leova?
- O lē fea o a matou sauniga faale-vaiao o sosoo mai e te fia auai ai?

Aiseā e Matou te La‘ei Onomea ai i a Matou Sauniga?

Po o e mātāuina i ata o lenei polosiuā le onomea o la‘ei o Molimau a leova, a o auai i sauniga a a latou faapotopotoga? Aiseā e matou te ua‘i toto‘a atu ai i o matou la‘ei ma teuga?

E faaalua ai le faaaloalo i lo matou Atua. E moni e silasila le Atua i tala atu o o tatou foliga vaaia. (1 Samuelu 16:7) Peita‘i, pe a matou faapotopototo e tapua‘i atu iā te ia, o le faa-naunauga o o matou loto ia faaalua atu le faaaloalo iā te ia ma o matou uso tapua‘i. Pe a tatou tula‘i i luma o se faamasinoga, e masani lava e tatou te faamautinoa o loo atagia atu i o tatou foliga vaaia le faaaloalo i le tulaga o le faamasino. I se tulaga talitutusa, o le auala e matou te la‘ei ai i sauniga, e faaalua ai lo matou faatāuina o le “Faamasino o le lalolagi uma,” o leova le Atua, ma le nofoaga o loo matou tapua‘i atu ai iā te ia.—Kenese 18:25.

E iloa ai tapulaa o loo matou ola ai. Ua fautuaina e le Tusi Paia Kerisiano ia fai la‘ei “onomea ma ia mafaufau lelei.” (1 Timoteo 2:9, 10) O le la‘eiina o ofu “onomea” e uiga atu i le ‘alofia o la‘ei e ono tosina mai ai le vaaia isi iā i matou ona o le faalialiavale, faatosina, po o le faaliali o nisi o vaega o le tino. E lē gata i lea, o le iai o se “mafaufau lelei,” e fesoasoani iā i matou e filifili ai la‘ei mananaia e lē teuanoa‘i, pe atagia atu ai tifiga uigaese o lenei lalolagi. O nei mataupu silisili o loo tuu mai ai le avanoa e faia ai filifiliga a le tagata lava ia. E auanoa ma ni upu, o o matou la‘ei onomea ma talafeagai e mafai ona ‘faamamaluina ai a‘oa‘oga a lo tatou Faaola,’ ma ‘faamamaluina ai le Atua.’ (Tito 2:10; 1 Peteru 2:12) O la‘ei onomea i taimi o sauniga, e mafai ona taa‘ina ai le auala e manatu ai isi i le tapua‘iga iā leova.

Aua ne‘i avea la‘ei ma mea e taofia ai oe mai le auai i sauniga. E mafai lava ona tatou la‘eiina ofu talafeagai, mamā ma onomea, nai lo o le faatalitali i se ofu taugatā.

- O le ā le tāua o le auala e matou te la‘ei ai i taimi o le tapua‘iga i le Atua?
- O ā mataupu silisili e ta‘ita‘ia ai a matou filifiliga e tusa ai o la‘ei ma teuga?



Iceland



Mekisikō



Guinea-Bissau

Filipaina





Cambodia



Ukraine



SA'ILI'ILI ATILI

Ia sauniuni mo le Su'esu'ega o le *Olomatamata* po o le Su'esu'ega Faale-Tusi Paia a le Faapopotoga, e ala i le mulimuli i le auala ua faatulaga mai i le pito i luga. Faatasi ma le fesoasoani a lau faia'oga o le Tusi Paia, ia sauni se tali e ono mafai ona e faia i le sauniga e sosoo ai.



O le ā le Auala e Sili Ona Lelei e Sauniuni ai mo Sauniga?

Pe afai o loo e su'esu'eina le Tusi Paia ma se Molimau a leova, atonu la e te taumafai e iloilo muamua le mataupu a o le'i faia su'esu'ega ta'itasi. Ina ia maua le tele o aogā, o se mea lelei ona faia fo'i faapea a o le'i auai i se sauniga a le faapopotoga. E maua i'uga e sili ona lelei pe a faataatia se faasologa lelei.

Filifili po o le ā le taimi ma le nofoaga e fai ai su'esu'ega.

O fea le taimi e sili ona lelei ai lau ua'i atu i se mea? Po o le taeao, a o le'i amata au galuega o le aso, po o le afiafi i le taimi ua momoe ai tamaiti? E tusa lava fo'i pe e lē mafai ona e su'esu'e mo se taimi umi, ae ia filifili po o le ā le tele o le taimi e mafai ona e faataatia ese, ma taumafai ia aua ne'i iai se mea e faalavelavea ai lenā taimi. Ia su'e se nofoaga e to'afilemu, ma aveese mea uma e faaua'i ese ai e ala i le tapē o le leitiō, televise ma le telefoni feavea'i. O le tatalo a o le'i faia au su'esu'ega o le a fesoasoani e faate'a ese ai popolega o le aso, ina ia mafai ai ona e ua'i atu i le Afioga a le Atua.—Filipi 4:6, 7.

Faailoga le mataupu, ma sauni e fai se sao. Ia amata e ala i le malamalama i le uiga atoa o le mataupu. Mafaufau e uiga i le ulutala o le mataupu, iloilo po o le ā le fesoota'iga o tama'i ulutala ta'itasi i lenā matua, ma iloilo so o se ata ma fesili autalu o loo faamatilatila mai ai manatu tāua. Ona faitau lea o palakalafa ta'itasi, ma su'e le tali o le fesili o palakalafa. Su'e ma faitau mau o loo sii mai, ma mafaufau i le auala o loo lagolagoina ai e na mau le mataupu. (Galuega 17:11) Pe a e maua le tali o le fesili, ona vase lea o ni nai upu po o faaupuga autū i le palakalafa e toe faamanatu atu ai iā te oe le tali. Pe a oo loa i le taimi o le sauniga, e mafai ona sii i luga lou lima ma fai se tali puupuu i au oe lava upu.

E ala i le iloiloaina o mataupu eseese e talanoaina i vaiaso ta'itasi i sauniga, o le a e faaopoopo ai manatu fou i lou “fale teuolaa” o le poto mai le Tusi Paia.—Mataio 13:51, 52.

- O le ā se faasologa e mafai ona e faatulaga ina ia sauniuni ai mo sauniga?
- E faapefea ona e sauni e fai se tali i le sauniga?

O le ā le Tapua'iga a le Aiga?

Talu mai aso anamua, na finagalo ai leova i aiga ta'itasi ia faaalu faatasi se taimi e atia'e ai se faiā malosi ma ia, ma faa-malosia ai o latou aiga. (Teuteronome 6:6, 7) O le pogai lenā e faataatia ese ai e Molimau a leova se taimi i vaiaso ta'itasi e tapua'i faatasi ai le aiga—e talanoa i se si'omaga to'afilemu mataupu faaleagaga e patino i o latou mana'oga. E tusa pe e te nofo to'atasi, ae e mafai ona faaaogā lelei lenā taimi e mafuta ai i le Atua, e ala i le su'esu'eina o le Tusi Paia i se mataupu ua e filifilia.

O se taimi e mafuta vavalalata ai iā leova. “Ia outou mafuta vavalalata atu i le Atua, ona mafuta vavalalata mai lea o ia iā te outou.” (Iakopo 4:8) E mafai ona tatou iloa lelei leova pe a a'oa'oina faamatalaga e uiga i ona uiga ma ana galuega e ala mai i lana Afioga le Tusi Paia. O le auuala faigofie e amata ai le tapua'iga a le aiga, o le faaalu lea o se taimi e faitau faatasi ai ma le leotele le Tusi Paia, atonu i le mulimuli i le faasologa o le vaiaso mo le Sauniga o le Faiva ma le Olaga Faa-Kerisiano. E mafai ona tofia sui ta'itasi o le aiga e faitau mai se vaega o le Tusi Paia, ona talanoa faatasi uma lea po o le ā se manatu na a'oa'oina mai i le Tusi Paia.

O se taimi e mafuta vavalalata ai sui o le aiga. O tane ma avā, faapea mātua ma fanau, e faamalosia a latou faiā pe a su'esu'eina le Tusi Paia o se aiga. E tatau ona avea o se taimi fiafia, filemu ma e tulimata'ia uma e le aiga i vaiaso ta'itasi. E faalagolago i tausaga o a latou fanau, e mafai ona filifili e mātua mataupu aogā e talanoaina, atonu e faaaogā ai mataupu mai i *Le Olomatamata* ma le *Ala Mai!* po o luga fo'i o la matou Upega tafa'ilagi o le jw.org. E mafai ona outou talanoa e faatatau i se faafitauli na feagai ma lau fanau i le a'oga, ma vaai po o le ā le auuala e fo'ia ai. Aiseā e tou te lē matamata ai i se polokalame o loo maua i le TV i le Initaneti a Molimau a leova, ma talanoa faatasi ai e uiga i lenā polokalame pe a mǎe'a? Atonu e te fiafia e faata'ita'i pese o le a usuina i le sauniga, ma taumamafa faatasi pe a mǎe'a le tapua'iga a le aiga.

O lenei taimi faapitoa e faaaluina i vaiaso ta'itasi e tapua'i faatasi ai iā leova, o le a fesoasoani i le aiga atoa e maua ai le olioli i le su'esu'eina o le Afioga a le Atua, ma o le a la matuā faamanuia i a outou taumafaiga.—Salamo 1:1-3.

- Aiseā e matou te faataatia ese ai se taimi mo le tapua'iga a le aiga?
- E faapefea i mātua ona faaaogā lenei taimi e avea ma taimi fiafia mo le aiga atoa?



Korea
i Saute

Pasili



Ausetalia



Guinea



SA'ILI'ILI ATILI

Ia talanoa atu i isi i le faapotopoto-ga e faatatau i mea o loo latou faia mo a latou tapua'iga a le aiga. Ia tilofa'ia fo'i po o ā mekasini o loo maua i le Maota mo Sauniga e faaaogā e a'oa'o ai lau fanau e uiga iā leova.





Siamani

Aiseā e Matou te Auai ai i Fonotaga Tetele?

Aiseā e foliga fiafia ai nei tagata? O loo latou auai i se tasi o a matou fonotaga. I le pei o auauna a le Atua i aso ua mavae, o ē na faatonuina ia faapotopoto faatolu i le tausaga, e matou te tulimata’i fo’i e faapotopoto faatasi i vaega to’atele. (Teuteronomo 16:16) I tausaga ta’itasi, e tolu a matou faatasiga tetele: e lua **fonotaga matagaluega** e ta’itasi aso, ma se **tauaofiaga itumalo** e tolu aso. E faapefea ona aogā iā i matou nei faatasiga?



Botswana

E faamalosia ai lo matou ‘auuso Kerisiano. E pei ona sa olioli tagata Isaraelu e vivii atu iā leova “i totonu o faapotopotoga,” e matou te fiafia fo’i e tapua’i faatasi atu iā te ia i faatasiga faapitoa. (Salamo 26:12; 111:1) O nei faatasiga e maua ai avanoa e feiloa’i ma faatasitasi ai ma Molimau mai i isi faapotopotoga pe mai i isi atunuu. I le aoauli, e matou te aai fiafia faatasi i le nofoaga o loo faia ai le fonotaga, ma maua atili ai se si’omaga faaleuō i nei faatasiga faaleagaga. (Galuega 2:42) I na fonotaga tetele e matou te tofo ai i le alofa, lea e autasia ai lo matou “‘auuso atoa” i le lalolagi.—1 Peteru 2:17.



Nicaragua

E fesoasoani e matou te aga’iga’i ai i luma faaleagaga. Sa maua fo’i e tagata Isaraelu aogā e ala i le “malamalama i upu” o le Tusi Paia na faamatala atu iā i latou. (Neemia 8:8, 12) E matou te talisapaia fo’i faatonuga mai i le Tusi Paia e maua mai i a matou fonotaga. O polokalame ta’itasi e faavae mai i se matua faale-Tusi Paia. E ala mai i lauga mananaia, lauga faasolo ma le toe faaataina o mea moni na tutupu, e matou te a’oa’oina ai le auala e fai ai le finagalo o le Atua i o matou olaga. E faalaeiauina i matou pe a faalogo atu i tala i mea na tutupu, i ē na taulau i le onosaia o le lu’i o le avea o ni Kerisiano i nei taimi faigatā. I tauaofiaga itumalo, o tala faatino e atili ai ona moni iā i matou tala o le Tusi Paia, ma matou a’oa’oina ai lesona aogā. E faia i fonotaga uma se papatisoga mo ē e manana’o e faailoga lo latou tuuina atu i le Atua.



Italia

SA’ILI’ILI ATILI

Pe afai e te fia iloa lelei lo matou ‘auuso, faamolemole ia auai mai i la matou fonotaga o loo sosoo mai. E mafai ona faaali atu e lou faia’oga o le Tusi Paia iā te oe le polokalame o le fonotaga, ina ia e iloa ai ituaiga mataupu o le a talanoaina. Faailoga i lau kalena le aso ma le nofoaga o le a faia ai le fonotaga o loo sosoo mai, ma auai ai pe afai e mafai.



- Aiseā e avea ai fonotaga o ni taimi fiafia?
- E mafai faapefea ona e maua aogā i le auai i se fonotaga?

E Faapefea Ona Faamaopoopo la Matou Galuega Tala'i o le Malo?

A o lata i lona maliu, na fetalai ai Iesu: “O le a tala'iina atu lenei tala lelei o le malo i le lalolagi atoa e fai ma molimau i atunuu uma; ona oo mai ai lea o le i'uga.” (Mataio 24:14) Ae ua faapefea ona faataunuuina lenei galuega tala'i i le lalolagi aoao? E ala i le mulimuli i le faaa'oa'oga na faataatia e Iesu a o iai i le lalolagi.—Luka 8:1.

E matou te taumafai e faafesoota'i tagata i o latou fale.

Na a'oa'o e Iesu ona soo ia tala'i atu le tala lelei mai lea fale i lea fale. (Mataio 10:11-13; Galuega 5:42; 20:20) O na tagata tala'i i le ulua'i senituri na tofia i oganuu faapitoa e tatau ona tala'i ai. (Mataio 10:5, 6; 2 Korinito 10:13) E faapena fo'i i aso nei, ua faamaopoopo lelei la matou galuega tala'i, ma ua tofu lava faapotopotoga ta'itasi ma oganuu ua tofia e latou te galulue ai. O lea auala ua mafai ai ona matou faataunuuina le faatonuga a Iesu ia “tala'i atu i tagata ma molimau mae'a-e'a.”—Galuega 10:42.

E matou te taumafai ia oo i tagata po o fea lava e maua ai.

Na faataatia fo'i e Iesu le faaa'oa'oga e ala i le tala'i atu i tagata i le lautele, e pei o luga o le matafaga po o se vaieli. (Mareko 4:1; Ioane 4:5-15) E matou te talanoa fo'i i tagata e uiga i le Tusi Paia po o fea lava e maua ai—i alatetele, i nofoaga o pisinisi, i paka po o le telefoni. E matou te molimau fo'i i o matou tuaoi, tagata e faigaluega ma a'oa'oga faatasi, ma tauaiga pe a maua se avanoa talafeagai. O nei taumafaiga uma ua mafai ai ona faalogo le faitau miliona o tagata i le lalolagi aoao i “le tala lelei o le faaolataga.”—Salamo 96:2.

Pe e mafai ona e mafaufau i se tasi e te mana'o e faasoa atu i ai le tala lelei o le Malo o le Atua, ma le aoga o lena tala lelei i lona lumana'i? Se'i aua lava ne'i e taofia le faailoa atu o lenei fe'au o le faamoemoe. Ia faailoa atu i isi i le vave e te mafai ai!

- O le ā le “tala lelei” e tatau ona faalauiloa atu?
- Ua faapefea ona faaa'oa'o Molimau a leova ia Iesu i le auala e tala'i ai?



Sepania



Belarus

Hong Kong



Peru

SA'ILI'ILI ATILI

Fesili atu i lau faia'oga o le Tusi Paia e faata'ita'i mai ia te oe, le auala e te ono faailoa atu ai ma le faautauta i tagata e te masani ai, se mea na e a'oa'oina mai i le Tusi Paia.





Kanata

Mai lea fale
i lea fale

Su'esu'ega faale-Tusi Paia

Su'esu'ega a le
tagata lava ia

O ai le Tagata ua Ta'ua o se Paeonia?

O le ta'u "paeonia" e masani ona faasino atu i ē e sa'ilia oga-nuu fou, ma tatalaina se ala mo isi e mulimuli i ai. Sa pei Iesu o se paeonia, e ala i le auina mai i le lalolagi ina ia faatino se galuega faasaoala ma tatala le ala i le faaolataga. (Mataio 20:28) I aso nei, o loo faaa'oa'o ona soo iā te ia e ala i le faa-alu o le taimi i le tele e mafai ai e 'faia isi ma soo.' (Mataio 28: 19, 20) O nisi ua mafai ona auai i le auaunaga e ta'ua o le au-aunaga faapaeonia.

O le paeonia o se tagata e tala'i faataimi atoa. O Molimau a leova uma o tagata tala'i o le tala lelei. Peita'i, o isi ua faatula-ga o latou olaga e auauna o ni *paeonia sauatoa*, e faaalu le 70 itula i masina ta'itasi i le galuega tala'i. Ina ia faia faapea, o le to'atele lava ua faatapulaa a latou galuega totogi i le galulue faavaitaimi. O isi ua filifilia e galulue o ni *paeonia faapito* i vaipanoa o loo tele ai le mana'oga mo tagata tala'i o le Malo, e faaalu le 130 itula pe sili atu i masina ta'itasi i le tala'iga. E lotomalilie paeonia e ola i se olaga faigofie, ma mautinoa o le a saunia e leova mea e latou te mana'omia i le olaga. (Mataio 6:31-33; 1 Timoteo 6:6-8) O ē e lē mafai ona paeonia faataimi atoa, e ono galulue o ni *paeonia lagolago* pe a mafai, ma faateleina lo latou sao i le tala'iga i le 30 pe 50 itula i se masina.

E uuna'ia se paeonia i le alofa i le Atua ma tagata. I le pei o Iesu, ua matou mātauina e to'atele tagata i aso nei o loo matuā mana'omia ona iloa le Atua ma lona finagalo. (Mareko 6:34) Ae ua iā i matou le poto lea e mafai ona fesoasoani iā i latou i le taimi nei, ma avatu ai iā i latou se faamoemoe mautū mo le lumana'i. O le alofa i tuaoi e uuna'ia ai se paeonia e foa'i atu ma le lotomalie lona taimi ma le malosia e fesoasoani ai i isi i le itu faaleagaga. (Mataio 22:39; 1 Tesalonia 2:8) O le i'uga, e faamalosi ai le faatuatua o le paeonia, atili ai ona mafuta vavalalata atu i le Atua, ma tofo ai i le tele o le olioli. —Galuega 20:35.

- E faapefea ona e faamatalaina se paeonia?
- O le ā e uuna'ia ai nisi e paeonia faataimi atoa?

O ā A'oga ua Saunia mo Paeonia?

Ua loa tausaga o iloga Molimau a leova i a latou a'oga faale-Tusi Paia. Ua saunia ni a'oga faapitoa mo i latou ua faaalu lo latou taimi atoa i le tala'ia o le Malo, ina ia mafai ai ona 'faia ma le mae'ae'a la latou faiva.'—2 Timoteo 4:5.

A'oga mo le Auaunaga Paeonia. Pe a mae'a se tausaga atoa o auauna pea se tasi o se paeonia sauatoa, ona agavaa lea e auai i se a'oga e faia mo aso e ono, i se Maota mo Sauniga e lata ane i lona vaipanoa. O le fuafuaga o lenei a'oga, ina ia fesoasoani i le paeonia e mafuta vavalalata atu ia leova, ia uigā lana faiva, ma ia tumau pea ma le faamaoni i lana auaunaga.

A'oga mo Tagata Tala'i o le Malo. E lua masina e faia ai lenei a'oga, ma e toleniina ai paeonia ua lava le poto masani, o ē ua lotomalilie e tuua o latou aiga ina ia auauna i se vaipanoa o loo tele ai le mana'oga. Ua faaa'oa'o i latou nei i lē na auauna o se Faievagelia sili i le lalolagi, o Iesu, e ala i le faapea atu: “O a'u lenei! Inā auina atu ia a'u.” (Isaia 6:8; Ioane 7:29) O le auauna i isi vaipanoa e ono aofia ai le faamasani i se olaga faafaigofie. Atonu e mana'omia fo'i ona faamasani i le aganuu, le tau, o mea'ai, ma a'oa'oina se isi gagana fou. E fesoasoani lenei a'oga i uso ma tuafāfine nofofua ma ulugalii ua 23 i le 65 tausaga le matutua, e atia'e uiga faaleagaga e mana'omia mo la latou auaunaga, aemaise o tomā e mafai ona aogā i le auaunaga ia leova ma lana faalapotopotoga.

A'oga Faale-Tusi Paia a le Olomatamata o Kiliata. I le gagana Eperu, o le upu “Kiliata” e uiga atu i ni “Molimau e To'atele.” Talu ona faavaeina le A'oga o Kiliata i le 1943, ua silia ma le 8,000 i latou na a'oa'oina ai ua auina atu o ni misionare e avatu se molimau i “tulu'iga uma o le lalolagi,” ma e tele i'uga lelei ua maua mai ai. (Galuega 13:47) Ina ua faato'ā taunuu misionare i le atunuu o Peru, sa le'i iai ni faapotopotoga i inā. Peita'i, ua silia nei ma le 1,000 faapotopotoga. Ina ua faato'ā taunuu fo'i misionare i Iapani, e le'i atoa se to'asefulu o tagata tala'i i lenā atunuu. Peita'i ua silia nei ma le 200,000 tagata tala'i. O le A'oga o Kiliata e faia mo le lima masina, ma e aofia ai le su'esu'eina mae'ae'a o le Afioga a le Atua. O lenei a'oga e maua ai ni toleniga e sili ona lelei, e fesoasoani e faatumauina ma faamalosiā ai le galuega tala'i i le lalolagi aoao. E mafai ona auai i lenei a'oga i latou o loo avea ma paeonia faapito, misionare i oganuu, o ē galulue i ofisa o lālā, po o i latou fo'i o loo iai i le galuega femalagaa'i.

- O le ā le fuafuaga o le A'oga mo le Auaunaga Paeonia?
- O ai ua fuafuaina i ai le A'oga mo Tagata Tala'i o le Malo?



Lunaite Setete



A'oga o Kiliata,
Patterson, Niu Ioka



Panama



Finilani



A'oa'o atu

Leoleoina le lafu



Molimau atu



SA'ILI'ILI ATILI

O ai e agavaa e avea ma auauna? E mafai ona e faitau i agavaa faale-Tusi Paia mo toeaina ma auauna o le faiva i le 1 Timoteo 3:1-10, 12, ma le Tito 1:5-9.



E Faapefea Ona Fesoasoani Toeaina i le Faapotopotoga?

E leai ni a matou faife'au totogi i la matou faalapotopotoga. Nai lo lea, e pei ona sa faia ina ua faato'ā amata le faapotopotoga Kerisiano, na tofia ovasia agavaa “ina ia leoleo le faapotopotoga a le Atua.” (Galuega 20:28) O nei toeaina o ni tane ua ta'umatuaina faaleagaga o loo ta'imua ma leoleoina le faapotopotoga, e lē “manatu i ai o se avega mamafa, ae ia faia ma le lotomalie; aua le faia ona o le fia maua o se mea i se auala faapi'opi'o, ae ia faia ma le lotonaunau.” (1 Peteru 5: 1-3) O ā galuega o loo latou faia mo i matou?

E latou te tausia ma puipuia i matou. E ta'ita'ia ma fesoasoani toeaina ina ia puipuia le faapotopotoga i le itu faaleagaga. I le iloaina ua faatuatuaina i latou e le Atua mo lenei tofiga tāua, e lē fia pulepuletutū ai toeaina i ona tagata, ae nai lo o lea, e latou te saosaolaumea mo lo matou lelei ma le olioli. (2 Korinito 1:24) E pei lava ona tinoū se leoleo mamoe e tausia ana mamoe ta'ito'atasi, e faapena fo'i ona taumafai toeaina e iloa sui ta'ito'atasi uma o le faapotopotoga.—Faataoto 27:23.

E latou te a'oa'oina i matou i le auala e faia ai le finagalo o le Atua. I vaiaso ta'itasi, e ta'imua toeaina i sauniga a le faapotopotoga, ina ia mafai ona faamalosia ai lo matou faatua-tua. (Galuega 15:32) O nei tane tuutoina atu e latou te ta'imua fo'i i le galuega tala'i, galulue faatasi ma toleniina i matou i vala uma o le faiva.

E latou te aumaia faalaeiauga mo i matou ta'ito'atasi. Ina ia tausia mana'oga faaleagaga o i matou ta'ito'atasi, e ono asiasi mai toeaina i o matou fale po o le Maota mo Sauniga, ina ia fesoasoani mai ma aumaia faamāfanafanaga mai i le Tusi Paia.—Iakopo 5:14, 15.

E lē gata i a latou galuega i le faapotopotoga, ae o le to'atele o toeaina e galulue fo'i i galuega faaletino ma tiute tauave faaleaiga lea e mana'omia ai lo latou taimi ma le malosi. E tala-feagai ai la ona matou faaloalo atu i nei uso e galulue mafa-mafa.—1 Tesalonia 5:12, 13.

- O ā matafaioi a toeaina o le faapotopotoga?
- O ā auala e faaalai ai e toeaina le naunau totino iā i matou?

O le ā le Matafaioi a Auauna o le Faiva?

Ua faamatalaina i le Tusi Paia vaega e lua o tane Kerisiano o ē o loo feagai ma tiute tauave i le faapotopotoga—o “ovasia ma auauna o le faiva.” (Filipi 1:1) O le tulaga masani e iai ni toea-ina ma auauna o le faiva o loo auauna i faapotopotoga ta’i-tasi. O ā galuega e faia e auauna o le faiva e aogā mo i matou?

E latou te fesoasoani i le ‘autoeaina. O auauna o le faiva o ni tane e matutua faaleagaga, maufaatuatuaina ma magafagafa, o nisi e talavou a o isi ua matutua. E latou te gafa ma galuega tāua ma galuega masani ia e fesoata’i atu i le faapotopotoga ma le Maota mo Sauniga, e ese mai i le a’oa’o atu ma le leoleoina o le lafu. O lenei tulaga e mafai ai ona ua’i atu toea-ina i tiute tauave tau a’oa’o atu ma le leoleoina o le lafu.

E latou te faia auaunaga tāua. O nisi auauna o le faiva ua tofia e avea ma tautua ina ia faafeiloa’i tagata uma e taunuu mai i sauniga. O isi atonu e taulimaina mea faaleotelele, le faasoaina o lomiga, vaaia o tupe a le faapotopotoga, ma le tofiaina o oganuu e tala’i ai sui o le faapotopotoga. E latou te fesoasoani fo’i i le tausia ma le faaleleia o le Maota mo Sauniga. E ono talosaga atu toea-ina iā i latou e fesoasoani i ē ua afu lo latou soifua. Po o ā lava tiute tauave e tuina atu i auauna o le faiva, ae e latou te lotomalilie e faia nei tiute, ma e faaaloalo le faapotopotoga iā i latou ona o a latou galuega mamafa ma le lotomalilie.—1 Timoteo 3:13.

E latou te faataatia se faaa’oa’oga lelei o ni tane Kerisiano. E filifilia auauna o le faiva ona o o latou uiga lelei faaleagaga. Pe a latou taulimaina vaega i sauniga, e latou te faamalositia lo matou faatuatua. E ala i le ta’imua i le galuega tala’i, e latou te fesoasoani mai ai ia atili ona matou maelega. Ona o lo latou galulue felagolagoma’i ma le ‘autoeaina, e latou te faa-tupuina ai le olioli ma le autasi. (Efeso 4:16) Mulimuli ane, e latou te ono agavaa fo’i e auauna o ni toea-ina.

- O ā ituaiga tane e iai auauna o le faiva?
- E faapefea ona fesoasoani auauna i le faapotopotoga ina ia sologa lelei?



Myanmar



Vaega i le sauniga



Vaega mo le tala’iga




Toe faaleleia o le Maota mo Sauniga

SA’ILI’ILI ATILI

I taimi uma e te alu ai i le Maota mo Sauniga, ia faamasani i se tasi o le ‘autoeaina po o auauna o le faiva, se’ia oo ina e iloa lelei i latou uma ma o latou aiga.





Malawi



Vaega mo le tala'iga



Galuega tala'i



Fono a toeaina

E Faapefea Ona Fesoasoani Ovasia Matagaluega iā i Matou?

E masani ona ta'ua i Tususiga Kerisiano Eleni ia Panapa ma le aposetolo o Paulo. O nei tane sa auauna o ni ovasia femalagaa'i, na asiasi atu i ulua'i faapotopotoga. Aiseā? Ona sa la manatu mamafa moni mo le lelei o o la uso faaleagaga. Na faapea mai Paulo sa mana'o "e toe fo'i e asiasi i uso" po o ā mai i latou. Na lotomalie o ia e malaga mo le faitau selau o maila [km] ina ia alu atu ma faamalosiau i latou. (Galuega 15: 36) O le faanaunauga fo'i lenā o loo iai i a matou ovasia femalagaa'i i aso nei.

E latou te asiasi mai e faalaeiau i matou. O ovasia matagaluega e faalua i le tausaga ona asiasi atu pe ā ma le 20 faapotopotoga, ma faaalu le vaiaso faatasi ma faapotopotoga ta'itasi. E matou te mauaina le tele o aogā mai i tala o mea na tutupu i nei uso, ma afai ua faaipopo e maua fo'i aogā mai i a latou avā. E latou te taumafai e faamasani i ē matutua atoa ma ē iti, ma e naunau e galulue faatasi ma i matou i le galuega tala'i faapea a matou su'esu'ega faale-Tusi Paia. O nei ovasia e faia asiasiga faaleoleo mamoe faatasi ma toeaina, ma faia lauga faalaeiau i sauniga ma fonotaga ina ia faamalosia ai i matou.—Galuega 15:35.

E latou te faalia le naunau i tagata uma. E naunau moni ovasia matagaluega i le itu faaleagaga o faapotopotoga. E latou te feiloa'i ma toeaina ma auauna o le faiva ina ia toe tilofa'ia le aga'iga'i i luma o le faapotopotoga, ma avatu fautuaga aogā i le auala e taulima ai o latou tiute tauave. E latou te fesoasoani i paeonia ina ia taulau manuia i la latou faiva, ma e fiafia e feiloa'i atu i ē fou ma faalogo atu i lo latou aga'iga'i i luma faaleagaga. E ofo mai e nei uso ta'ito'atasi i latou lava e matou te "galulue faatasi mo lo [matou] lelei." (2 Korinito 8: 23) E tataua ona matou faata'ita'i i lo latou faatuatua ma le tuutoina i le Atua.—Eperu 13:7.

SA'ILI'ILI ATILI

Ia faamau i lau kalena le aso o le asiasiga e sosoo ai a le ovasia matagaluega i le faapotopotoga, ina ia aua ne'i e misia ana lauga i le Maota mo Sauniga. Afai e te mana'o iā te ia po o lana avā e auai i sau su'esu'ega faale-Tusi Paia i lenā vaiaso ina ia tou faamasani, ia faailoa atu i lau faia'oga.



- O le ā le fuafuaga e asiasi ai ovasia matagaluega i faapotopotoga?
- E faapefea ona e maua aogā mai i a latou asiasiga?

E Faapefea Ona Matou Fesoasoani i o Matou Uso o Loo Mafatia?

Pe a tupu se mala, e vave ona faamaopoopo e Molimau a leova fesoasoani lavea'i e avatu i o latou uso o loo aafia. O nei gaoioiga e faaalua ai le moni o lo matou alofa o le tasi i le isi. (Ioane 13:34, 35; 1 Ioane 3:17, 18) O ā auala e matou te fesoasoani atu ai?

E matou te foa'i atu tupe. Ina ua tupu se oge tele i lutaia, sa auina atu e ulua'i Kerisiano i Anetioka le fesoasoani tau-tupe i o latou uso Kerisiano. (Galuega 11:27-30) I se tulaga tutusa, pe a matou iloa o loo feagai o matou uso i nisi vaega o le lalolagi ma tulaga faigatā, e matou te auina atu foa'i tau-tupe e ala i a matou faapotopotoga, ina ia avatu fesoasoani faaletino i ē o loo matuā mana'omia.—2 Korinito 8:13-15.

E matou te avatu fesoasoani talafeagai. O toeaina e nonofo i le vaipanoa o loo tupu ai se mala, e latou te faafesoota'ia sui ta'itasi o le faapotopotoga ina ia faamautinoa o loo saogalemu tagata uma. E ono ta'imua se komiti o fesoasoani lavea'i i le faasoasoina o fesoasoani tau mea'ai, lavalava, fale ma togafitiga faafoma'i. E to'atele Molimau o loo iai le tomai e mana'omia, e tauofo e faatupe e i latou lava a latou tupe faaalu ina ia ō atu ma auai i galuega fesoasoani, pe toe faaleleia fale o aiga ma Maota mo Sauniga ua faaleagaina. O le autasi o loo matou olioli ai o se faalapotopotoga ma mea e tutupu i lo matou galulue faatasi, ua mafai ai ona vave a matou galuega i le taimi e mana'omia. E ui e faalatele atu lo matou alofa i “ē [matou] te aiga i le faatuatua,” ae e matou te fesoasoani atu fo'i i isi pe a mafai, e tusa lava po o le ā la latou tapua'iga.—Kalatia 6:10.

E matou te ofo atu le fesoasoani i le itu faaleagaga ma le itu tau faalogona. E sili ona mana'omia e i latou e aafia i se mala ni faamāfanafanaga. O taimi na e matou te maua ai le malosi mai iā leova, “le Atua o faamāfanafanaga uma.” (2 Korinito 1:3, 4) E matou te fiafia e faasoa atu i ē o loo mafatia folafolaga a le Tusi Paia, ma avatu le faamautinoaga ua lē o toe umi ona aumaia lea e le Malo o le Atua, le i'uga i mea leaga uma e māfua ai tigā ma puapuaga.—Faaaliga 21:4.

- Aiseā e mafai ai ona vave tali atu Molimau a leova i taimi o mala?
- O ā faamāfanafanaga faaleagaga e mafai ona matou faasoa atu i ē e faasaoina?



Dominican Republic



Iapani



Haiti



O ai le Pologa Faamaoni ma le Faautauta?

A o lata i lona maliu, sa faia ai e Iesu se talanoaga e na o i latou ma ona soo e to‘afā—o Peteru, Iakopo, Ioane ma Anete-rea. A o valoia e Iesu le faailoga o lona faatasi mai i aso e gata ai, na ia lāgā se fesili tāua: “O ai la le pologa faamaoni ma le faautauta, o lē ua tofia e lona matai e vaavaaia lana ‘aufai-galuega, e avatu a latou mea‘ai i le taimi tatau?” (Mataio 24: 3, 45; Mareko 13:3, 4) Na faamautinoa atu e Iesu i ona soo e faapea, ona o ia o lo latou “matai,” o le a ia tofia ē e saunia le tele o taumafa faaleagaga mo ona soo i le taimi o le i‘uga. O ai e faia a’e ai lenei pologa?



E matou te maua uma aogā mai i a matou mea‘ai faaleagaga

Se vaega to‘aitiiti o soo faauuina o Iesu. O le “pologa” e faasino atu i le Vaega Pule a Molimau a leova. O loo latou tufatufaina mai mea‘ai faaleagaga i le taimi tatau mo tagata tapu a’i o leova. E matou te faalagolago i lenei pologa faamaoni e aumaia pea mo i matou “mea‘ai e talafeagai i le taimi tatau.” —Luka 12:42.

E latou te tausia le aiga o le Atua. (1 Timoteo 3:15) Na tuu atu e Iesu i le pologa le tiute tauave tāua o le puleaina o le galuega a le vaega i le lalolagi o le faalapotopotoga a leova—e vaavaaia ana meatotino, faatonutonuina le galuega tala’i, ma a’oa’oina i matou e ala mai i a matou faapotopotoga. O lea, ina ia saunia mai mea e matou te mana’omia, o loo tufatufa mai e “le pologa faamaoni ma le faautauta” mea‘ai faaleagaga, e ala mai i lomiga o loo matou faaaogā i la matou tala’iga, faapea polokalame o loo faia i a matou sauniga ma fonotaga.

O loo *faamaoni* le pologa i upu moni o le Tusi Paia ma lo latou tofiga ia tala’i atu le tala lelei, ma e *faautauta* i le vaavaaia o mea a Keriso i le lalolagi. (Galuega 10:42) O loo faamanuia e leova le galuega a le pologa i le faateleina ma le anoanoa’i o sauniuniga faaleagaga.—Isaia 60:22; 65:13.

- O ai na tofia e Iesu e fafagaina faaleagaga ona soo?
- I ā auala ua faamaoni ai ma faautauta le pologa?



E Faapefea Ona Galulue le Vaega Pule i Aso Nei?

I le ulua'i senituri, o se vaega to'aitiiti o "le 'auaposeitolo ma toeaina i Ieruselema," sa auuuna o se vaega pule i le faia o faai'uga tāua mo le faapotopotoga Kerisiano faauuina atoa. (Galuega 15:2) Afai e latou autasi i se faai'uga, o le i'uga lenā o le talanoaina o manatu o le Tusi Paia, ma le ususita'i i le ta'ita'iga a le agaga o le Atua. (Galuega 15:25) O le auala lava fo'i lenā o loo mulimuli ai i aso nei.

O loo faaaogā e le Atua e faia lona finagalo. O uso faauuina o loo auuuna i le Vaega Pule, e latou te matuā nau-nau i le Afioga a le Atua, ma e telē lo latou malamalama i le auala e taulima ai mataupu aogā ma faaleagaga. E latou te feiloa'i i vaiaso ta'itasi ina ia iloilo mana'oga o le 'auuso i le lalolagi atoa. E pei lava o le ulua'i senituri, e latou te aumaia faatonuga e faavae mai i le Tusi Paia, e ala mai i ni tusi po o ovasia femalagaa'i ma isi. O lenei faiga e autasi ai tagata o le Atua i manatu ma gaoioiga. (Galuega 16:4, 5) E vaavaaia e le Vaega Pule le sauniunia o taumafa faaleagaga, faalaeiau tagata ia faamuamua le galuega tala'i, ma vaavaaia le tofiaina o uso i tulaga mo tiute tauave.

E latou te tali vave atu i le ta'ita'iga a le agaga o le Atua. E taula'i atu le Vaega Pule i Lē e Pule Silisili Ese, o leova, ma le Ulu o le faapotopotoga, o Iesu, mo le ta'ita'iga. (1 Korinito 11:3; Efeso 5:23) E lē vāai sui ta'itasi o le Vaega Pule iā i latou lava o ni ta'ita'i i tagata o le Atua. O i latou faatasi ma Kerisiano faauuina, e "mulimuli atu i le Tama'i Mamoe [o Iesu] i mea uma e alu i ai o ia." (Faaaliga 14:4) E matuā talisapaia e le Vaega Pule a matou tatalo mo i latou ma la latou galuega.

- O ai sa iai i le vaega pule i le ulua'i senituri?
- E faapefea ona sa'ilia e le Vaega Pule i aso nei le ta'ita'iga a le Atua?



Le vaega pule i le ulua'i senituri



Faitauina o le tusi mai le vaega pule

SA'ILI'ILI ATILI

Faitau le Galuega 15:1-35, ma vaai pe faapefea e le vaega pule i le ulua'i senituri ona talanoaina ma fo'ia se faafitauli, e ala i le fesoasoani a le Tusi Paia ma le agaga paia.





Matagaluega
Tusiata, Amerika



Siamani



Kenya



Kolomepia

O le ā le Peteli?

O le Peteli, o se igoa faa-Eperu, o lona uiga o le “Fale o le Atua.” (Kenese 28:17, 19 fpl.) O se ta’u ua talafeagai mo nofoaga ua faatūina e Molimau a leova i so o se vaega o le lalolagi, ia e faatonotonu ma lagolagoina ai le galuega tala’i. O loo auuna le Vaega Pule i le ofisa ulu i le Setete o Niu Ioka i Amerika, ma e vaavaaia mai i inā galuega a ofisa o lālā i le tele o atunuu. I le avea ai ma vaega, e iloa ē o loo auuna i nei fale o le aiga Peteli. I le pei o se aiga, e latou te nonofo ma galulue faatasi, olioli faatasi i taimi o taumafataga, ma su’esu’e faatasi ma le autasi le Tusi Paia.—Salamo 133:1.

O se nofoaga faapitoa o loo galulue faataulagaina ai sui o le aiga. I fale o Peteli uma, o loo iai tane ma fafine Kerisiano ua tuutoina atu e fai le finagalo o le Atua, ma auuna faataimi atoā i mana’oga o le Malo. (Mataio 6:33) E lē mauaina e se tasi o i latou se todogi, ae ua saunia potu ma mea’ai mo i latou uma, ma se alauni ina ia fesoasoani i mea e mana’omia e le tagata lava ia. E tofu tagata uma i Peteli ma se galuega, a lē i le ofisa, umukuka po o le potu ‘ai. O isi e galulue i se fale lomitusi po o le tuufaatasia o tusi, po le teuina o potu, fale ta-meā, faaleleia o fale po o isi mea.

O se nofoaga pisi e lagolagoina ai le tala’iga o le Malo. O le sini autū o Peteli uma ia maua e le to’atele o tagata le upu moni o le Tusi Paia i le tele e mafai ai. O se faata’ita’iga o lenā tulaga o lenei polosiua. Sa tusia i lalo o le vaavaaiga a le Vaega Pule, lafo atu i le faitau selau o vaega faaliliu i le lalolagi aoao e ala atu i komepiuta, lomina i masini lomitusi televavave i fale lomitusi i nisi o Peteli, ma auina atu i le silia i le 110,000 faapopotoga. A o faagasolo vaega uma o lenei galuega, e matuā lagolagosua aiga Peteli i le galuega e sili ona faanatinati i galuega uma—o le tala’iina atu o le tala lelei.—Mareko 13:10.

- O ai e galulue i Peteli, ma o ā sauniuniga ua faia mo i latou?
- O le ā le galuega faanatinati ua lagolagoina i galuega o loo faia i Peteli ta’itasi?


O ā Galuega o Loo Faia i se Ofisa o le Lālā?

O sui o le aiga Peteli e galulue i matagaluega eseese, ma vaa-vaavaia le faagaoioga o le galuega tala'i i se atunuu e tasi pe sili atu fo'i. Atonu e latou te galulue i le 'aufaaliliu, lolomiina o mekasini, tuufaatasia o tusi, fale tetele e teu ai tusi, saunia o polokalame i TV ma vitiō, pe vaaia isi mataupu mo lea itulagi.

E vaavaaia e le Komiti o le Lālā le galuega. E tuuina atu e le Vaega Pule le faagaoioga o ofisa o lālā ta'itasi i Komiti o Lālā, lea e faia a'e i toeaina agavaa e to'atolu pe sili atu fo'i. E faailoa atu pea e le komiti i le Vaega Pule le faagasologa aga'iga'i i luma o galuega i atunuu ta'itasi o loo i lalo o la latou vaavaaiga, faapea so o se faafitauli e tula'i mai. O nei lipoti e fesoasoani i le Vaega Pule e filifili ai po o ā ni mataupu e tatau ona talanoaina i lomiga, sauniga ma fonotaga i le lumana'i. O ē e fai ma sui o le Vaega Pule, e auina atu e lē aunoa e asiasi i lālā ma avatu ta'iala mo Komiti o Lālā i le taulimaina o o la-tou tofiga eseese. (Faataoto 11:14) E fuafuaina se polokalame faapitoe a aofia ai se lauga a le sui o le ofisa ulu, e faalaeiau ai i latou o loo nonofo i oganuu o le lālā.

E tuuina atu le lagolagosua i faapotopotoga ta'itasi. E faamaonia e uso ta'umatuaina i ofisa o lālā le faatutūina o faapotopotoga fou. E faatonutonuina fo'i e uso galuega a paeonia, misionare, ma ovasia matagaluega o loo auaina i oganuu o le lālā. E latou te faamaopoopo fonotaga ma tau-aofiaga, ma faatulaga le fausiaina o Maota fou mo Sauniga, ma faamautinoa ua auina atu lomiga ma tusi i faapotopotoga e tusa ma o latou mana'oga. O mea uma e faia i le lālā e saosaolaumea i le faamaopoopoina lelei o le galuega tala'i. —1 Korinito 14:33, 40.

- E faapefea ona fesoasoani Komiti o Lālā i le Vaega Pule?
- O ā tiute tauave e gafa ma se ofisa o le lālā?



Atu
Solomona



Kanata



Aferika i
Saute

SA'ILI'ILI ATILI

E talia ma le māfana i latou e asiasi mai i so o se ofisa o a matou lālā, mai i le Aso Gafua e oo i le Aso Faraile. E matou te valaaulia oe ia faia faapea. Pe a e asiasi mai, ia la'ei e pei lava o loo e auai i se sauniga. O le a faamalosia lou faatuatua e ala i le maimoa i le nofoaga e ta'ua o Peteli.





Matagaluega o Tususiga, Amerika



Korea i Saute



Armenia



Burundi



Sri Lanka

E faapefea Ona Tusia ma Faaliliuina a Matou Lomiga?

Ina ia matou faia le mea silisili e faalauiloa atu ai le “tala lelei” i “nuu uma, ma ituaiga uma, ma gagana uma, ma tagata uma,” e matou te saunia lomiga i le silia i le 750 gagana. (Faaaliga 14:6) E faapefea ona matou faataunuaina lenei galuega tele? E matou te faia e ala i le fesoasoani a le vaega o tususiga faavaomalo faapea se ‘aufaaliliu e galulue mamafa —o i latou uma o Molimau a leova.

E faia le ulua’i tususiga o mataupu i le faa-Peretania. E vaavaaia e le Vaega Pule galuega a le Matagaluega o Tususiga i la matou ofisa ulu i le lalolagi. O lenei matagaluega e faasoasoaina atu tofiga i ē e tusia nei mataupu, ia o loo auaina i ofisa ulu ma nisi o ofisa o lālā. Ona o le to’atele o le ‘aufaigaluega e tusia mataupu e mai i atunuu eseese, ua mafai ai ona matou tusia mataupu e aogā i tagata mai i aganuu eseese, ma ua fiafia ai tagata o atunuu eseese i a matou lomiga.

Ona auina atu lea o mataupu i le ‘aufaaliliu. A mǎe’a ona faatonutonu ma faamaonia mataupu na tusia, ona lafo atu lea i komepiuta i ‘aufaaliliu i le lalolagi atoa, ia e faaliliuina, siaki, ma faitau po ua sa’o ma sologa lelei le mataupu. E latou te taumafai e filifili “upu moni” lea e maua ai le uiga moni o le faa-Peretania i la latou gagana.—Failauga 12:10.

E faavavevave e komepiuta galuega. E lē mafai e se komepiuta ona suitulaga i tagata tusitusi ma faaliliu. Peita’i, e mafai ona faavavevave a latou galuega e ala i le faaaogāina o lomifefiloi ma polokalame ua i totonu o komepiuta, faapea ma isi mea-faigaluega mo sa’ili’iliga. Ua saunia e Molimau a leova se polokalame e ta’ua o le MEPS, lea e mafai ona tuuina ai le mataupu i le faitau selau o gagana, tuufaatasia ai ma le tele o ata, ma saunia ai mo le lolomiina.

Aiseā ua faia ai lenei taumafaiga tele, e oo lava i gagana e lē to’atele nisi e tautatala ai? Talu ai o le finagalo o le Atua “ia faaolaina ituaiga uma o tagata ma ia maua le poto sa’o i le upu moni.”—1 Timoteo 2:3, 4.

- O ā galuega e aofia ai i le saunia o a matou lomiga?
- Aiseā e lomina ai a matou lomiga i le tele o gagana?

E Faapefea Ona Faatupe la Matou Galuega i le Lalolagi Aoa?

Ua lomia ma tufatufaina atu e la matou faalapotopotoga le faitau selau miliona o Tusi Paia, ma isi lomiga i tausaga uma lava e aunoa ma se totogi. E matou te fausia ma faaleleia Maota mo Sauniga ma ofisa o lālā. E matou te tausia fo’i le faitau afe o tagata Peteli ma misionare, ma saunia fesoasoani i taimi o mala. Atonu la e te taumānatu, ‘E faapefea ona faatupe nei mea uma?’

E lē faia ni a matou sefulua’i, totogi se tupe pe aoina se peteti. E ui ina maualuga le aofa’i o tupe e lagolagoina ai la matou galuega faaevegelia, ae e lē faia ni a matou su’ega tupe. E silia ma le senituri ua mavae, na ta’ua ai i le lomiga lona lua o le mekasini o le *Watchtower* e faapea, e matou te talitonu o loo lagolagoina e leova i matou, ma o le pogai lenā e “lē taitai ai ona matou ‘aisi pe talosagaina se fesoasoani a isi”—ma e matou te lē o faia lava!—Mataio 10:8.

O loo lagolagoina a matou galuega i foa’i tauofo. E to’atele tagata e latou te talisapaia la matou galuega taua’oa’oga faale-Tusi Paia, ma foa’i mai fesoasoani tau tupe. E foa’i atu ma le lotomalilie e Molimau a leova o latou taimi, malosi, tupe, ma isi alagā’oa ina ia faia ai le finagalo o le Atua i le lalolagi atoa. (1 Nofoaiga a Tupu 29:9) O loo iai i Maota mo Sauniga ma Maota mo Fonotaga ma Tauaofiaga, pusa mo meaalofa e foa’i ai tupe a i latou e manana’o e faia faapea. E mafai fo’i ona faia foa’i tauofo e ala i la matou Upega tafa’i-lagi o le jw.org. E masani lava, o i latou e faia foa’i e lē o ni tagata mauolofa, ae e pei o le fafine mativa lea sa ta’uleleia e Iesu na lafoina ni tupe iti se lua, i le pusa tupe o le malumalu. (Luka 21:1-4) O lea, e mafai e so o se tasi ona “tuu ese se mea,” ma e faia “e tusa ma le mea ua filifili i lona loto.” —1 Korinito 16:2; 2 Korinito 9:7.

E matou te talitonu o le a faaauau pea ona uuna’ia e leova loto o i latou e manana’o e ‘āva iā te Ia i a latou ‘oa,’ ina ia lagolagoina ai le galuega o le Malo ona faataunuaina ai lea o lona finagalo.—Faataoto 3:9.

- O le ā le mea e ese mai ai la matou faalapotopotoga mai i isi lotu?
- E faapefea ona faaaogā foa’i tautupe?



Nepale



Togo



Peretania



Polivia

Aiseā ma e Faapefea Ona Matou Fausia Maota mo Sauniga?

O le Maota mo Sauniga, o le nofoaga autū lea o loo tala-noaina ai a’oa’oga faale-Tusi Paia e faatatau i le Malo o le Atua—le autū o le faiva a Iesu.—Luka 8:1.

O nofoaga autū na o le tapua’iga moni i o matou vaipanoa.

O Maota mo Sauniga e faapotopoto ai Molimau a leova mo le galuega o le tala’ia o le tala lelei o le Malo. (Mataio 24:14) E eseese le tetelē ma le fausaga o Maota mo Sauniga, ae e fausia uma i fausaga faaonapōnei ma e silia i le tasi faapotopotoga e faaogāina nisi o na Maota. I nai tausaga talu ai nei, na matou fausiaina ai le faitau sefulu afe o Maota fou mo Sauniga (i se fua faatatau e lima maota i le aso), ina ia talafeagai ma le faatupula’ia o a matou faapotopotoga. E mafai faapefea ona faataunuu lenei mea?—Mataio 19:26.



Nigeria, i le taimi muamua ma mulimuli ane

E fausia i meaalofa foa’i ua faia faapitoa mo lea fuafuaga. O nei meaalofa e auina atu i le ofisa o le lālā, ina ia mafai ona maua e faapotopotoga se tino i tupe e fausia pe toe faaleleia ai se Maota mo Sauniga.

E fausia e tagata tauofo e lē totogiina mai i atunuu ma tulaga eseese.

I le tele o atunuu, ua faamaopoopoina ai **Vaega Faufale mo Maota mo Sauniga**. E ō atu vaega o auauna ma tagata faufale tauofo mai lea faapotopotoga i lea faapotopotoga i totonu o se atunuu, e oo lava fo’i i vaipanoa maotua, ina ia fesoasoani i faapotopotoga i le fausiaina o a latou Maota mo Sauniga. I isi atunuu, ua tofia ni Molimau agavaa e vaavaaia le fausiaina ma le toe faafouina o Maota mo Sauniga i se vaipanoa ua tofia. E ui e to’atele uso faufale tomai mai i isi vaipanoa e tauofo e fesoasoani i le fausiaina o Maota, ae i nofoaga uma e faia ai faugāfale, o le to’atele o tagata e galulue tauofo e faia a’e i sui o le faapotopotoga. E mafaia nei mea uma ona o le agaga o leova ma taumafaiga mai le loto a ona tagata. —Salamo 127:1; Kolose 3:23.

- Aiseā ua ta’ua ai nofoaga mo la matou tapua’iga o Maota mo Sauniga?
- Ua mafai faapefea ona fausiaina Maota mo Sauniga i le lalolagi aoao?



Tahiti

E Faapefea Ona Matou Fesoasoani e Tausia Lelei a Matou Maota mo Sauniga?

O Maota mo Sauniga uma a Molimau a leova o loo tauaveina ai le suafa paia o le Atua. O lea la, e matou te manatu o le aufaatasi i le tausia pea o le mamā o le maota, faamatagofie ma toe faafou i sona tulaga lelei, o se faaeaga ma o se vaega tāua o la matou tapua'iga paia. E mafai ona fai se sao o tagata uma.



Estonia

Tauofo e fai nisi o galuega faamamā pe a uma le sauniga.

Pe a mǎe'a sauniga ta'itasi, e faia ma le fiafia e uso ma tuafāfine sina galuega faamamā i le Maota mo Sauniga. E faatasi i le vaiaso ona fai se galuega e faamamā atoa ai mea uma. O se toeaina po o se auauna o le faiva e vaaia le galuega, e masani lava ona mulimuli i se lisi o mea e tatau ona fai. E fuafua i le mana'oga, e tauofo nisi e salu, solo le fola, tafi le pefu, faatutalaga lelei nofoa, faamamā ma faamanogi falelēta'ua, solo faamalama ma fā'ata, tia'i lapisi, pe faamamā ma tausia lelei le fanua ma fafo o le maota. E faatasi i le tausaga ona fai se galuega tele tuufaatasi mo le faamamāina o totonu ma fafo. E ala i le faaaofia ai o a matou fanau mo nisi o tiute, ua matou a'oa'oina ai i latou ia faaloalo i lo matou nofoaga mo le tapua'iga.—Failauga 5:1.



Zimbabwe

Fesoasoani i le faalelia o so o se mea o loo mana'omia. I

tausaga ta'itasi, e faia ai se iloiloga mǎe'ae'a o le Maota mo Sauniga, i totonu ma fafo. E tusa ai ma lenei iloiloga, e faia ai e lē aunoa se galuega o le tausia lelei ma siaki pea o le Maota ina ia tumau pea ona lelei, e fesoasoani e 'alofia ai tupe faaalu e lē mana'omia. (2 Nofoaiga a Tupu 24:13; 34:10) O se Maota mo Sauniga e mamā ma tausia lelei, o se nofoaga tāua lea e tapua'i atu ai i lo matou Atua. E ala i le faia o se sao i lenei galuega, e faaalua ai o loo matou faalatalata atu iā leova ma e tāua i o matou loto le nofoaga mo le tapua'iga. (Salamo 122:1) O lenei vala o se taa'iga lelei i tagata o le vaipanoa.—2 Korinito 6:3.



Mongolia


- Aiseā e lē tatau ai ona matou faatamala i le nofoaga mo la matou tapua'iga?
- O ā faatulagaga ua faia ina ia tausisia ai pea le mamā o le Maota mo Sauniga?

Puerto Rico





Israelu

Czech
Republic

Benin

Cayman
Islands

E Faapefea Ona Aogā iā i Matou le Potu Tusi i le Maota mo Sauniga?

Pe e te fiafia e fai ni au sa'ili'iliga ina ia faalolotoina ai lou malamalama i le Tusi Paia? Pe e te fia iloa e faatatau i se mau patino po o se tagata, nofoaga, po o mea o loo ta'ua i le Tusi Paia? Pe na e tau tomānatu pe e mafai e le Afioga a le Atua ona fesoasoani iā te oe i se popolega autū o loo e fesaga'ia?

E maua ai tusi ma lomiga e aogā mo sa'ili'iliga. Atonu e lē o lomiga uma faale-Tusi Paia a Molimau a leova i lau gagana o loo iai iā te oe. Ae peita'i o loo iai i le potu tusi i le Maota mo Sauniga mekasini ma tusi faato'ā mae'a ona lolomiina. Atonu fo'i o loo iai ma ni lomiga eseese o le Tusi Paia, se lomifefiloi lelei, atoa ma isi fesoasoani aogā. E mafai ona e sa'oloto e faaaogā le potu tusi a o le'i amata po o le mae'a fo'i o sauniga. Afai ua iai se komepiuta, atonu ua uma ona tuu i ai se *Watchtower Library*. O le polokalame o le komepiuta lea o loo iai le tele o lomiga ma auala faigofie e mafai ona e su'e ai se mataupu, se upu, po o se mau.

E aogā mo le 'aua'o'oga i le Sauniga o le Faiva ma le Olaga Faa-Kerisiano. Atonu e mafai ona e faaaogā tatau le potu tusi i le Maota mo Sauniga pe a sauni sau vaega. O le ovasia o le Sauniga o le Faiva ma le Olaga Faa-Kerisiano e gafa ma le vaaia o le potu tusi. O ia e iai le matafaioi ina ia mautinoa ua iai lomiga fou ma ua faatulaga lelei. E mafai e ia po o lau faia'oga o le Tusi Paia ona faasino atu le auala e sa'ilia ai faamatalaga o loo e mana'omia. Peita'i e lē tatau ona toesea mai ni tusi mai le Maota mo Sauniga. Ma e matou te manana'o e taulimaina ma le faaeteete tusi ina ia aua ne'i palapala.

Ua ta'ua i le Tusi Paia e faapea ina ia maua le “poto i le Atua,” e tatau ona tatou lotomalilie e sa'ili e pei “o le oloa lilo.” (Faataoto 2:1-5) E mafai ona aogā iā te oe le potu tusi i le Maota mo Sauniga e faia ai au sa'ili'iliga.

- O ā meafaigaluega mo sa'ili'iliga e mafai ona maua i le potu tusi i le Maota mo Sauniga?
- O ai e mafai ona fesoasoani iā te oe ina ia faaaogā lelei le potu tusi?

SA'ILI'ILI ATILI

Afai e te mana'o e amata sau lava fata tusi, vaai po o ā ni tusi e maua i le fata tusi a le faapopotoga. E mafai e lau faia'oga o le Tusi Paia ona fautua atu po o ā lomiga e tatau ona e maua muamua.



O ā Mea e Mafai Ona Maua i la Matou Upega Tafa'ilagi?

Na fetalai atu Iesu i ona soo: “Ia susulu atu lo outou malamalama i luma o tagata, ina ia latou iloa a outou galuega lelei ma vivii atu ai i lo outou Tamā o i le lagi.” (Mataio 5:16) O le mea lea ua matou faaaogā tatau ai tekinolosi faaonapōnei, e aofia ai le Initaneti. O la matou Upega tafa'ilagi o le **jw.org**, o le puna aloa'ia o faamatalaga i luga o le Initaneti, e faatatau i talitonuga ma galuega a Molimau a leova. O ā mea o loo faaalia mai ai?

O tali mai le Tusi Paia i fesili e masani ona lāgā. E mafai ona e maua tali i nisi o fesili e sili ona tāua lea e masani ona tuufesili ai tagata. O se faata'ita'iga, o loo maua i le Initaneti sāvali o le *Po o le a Faai'uina ea Mafatiaga?* ma le *Pe e Mafai Ona Toe Feola Mai E ua Maliliu?* i gagana e silia i le 600. E mafai fo'i ona e maua le *Faaliliuga a le Lalolagi Fou* i le silia ma le 130 gagana ma le anoanoa'i o fesoasoani i le faia o su'esu'ega faale-Tusi Paia, e aofia ai le tusi *O ā A'oa'oga Moni a le Tusi Paia?*, ma lomiga pito i lata mai o le *Watchtower* ma le *Awake!* O le tele o nei lomiga e mafai ona faitau pe faalogo i ai i luga o le Initaneti, pe e mafai fo'i ona kopiina (download) o se MP3, PDF, po o se EPUB. E mafai fo'i ona e lolomiina ni itulau ma tufa atu i se tagata fiafia i lana lava gagana! E maua fo'i vitiō i le tele o gagana a tagata logonoa. E mafai fo'i ona e pu'eina le faitauga o le Tusi Paia, Tala faale-Tusi Paia ma pese mālie ua saunia e te maua ai le fiafia.

Faamatalaga sa'o e uiga i Molimau a leova. O loo iai fo'i tala fou ma ata vitiō e faatatau i la matou galuega i le lalolagi aoao, o mea na tutupu e aafia ai Molimau a leova, ma la matou galuega fesoasoani i ē mafatia. E mafai ona e maua ai faasilasilaga o tauaofiaga o loma nei ma faamatalaga o fesoota'iga mo a matou ofisa o lālā.

E ala i nei mea, ua matou faasusulu atu ai le malamalama o le upu moni i vaega pito i mamao o le lalolagi. Ua maua le tele o aogā e tagata uma mai so o se atunuu e aofia ai le Antarctica. E matou te tatalo “ina ia vave ona aga'i i luma le afioga a leova” i le lalolagi atoa, mo le viiga o le Atua.—2 Tesalonia 3:1.


- E faapefea i le **jw.org** ona fesoasoani i le tele o tagata ina ia a'oa'oina le upu moni o le Tusi Paia?
- O le ā e te mana'o e maua mai i la matou Upega tafa'ilagi?



Falani



Polani



Rusia

O SE LAPATA'IGA:

O nisi tuatusi i le Initaneti ua faatulaga e tagata tetee ina ia faasalalau atu ai faamatalaga lē sa'o e faatatau i la matou faalapopotoga. O lo latou faanaunauga ina ia tata'i ese tagata mai i le au-auna atu iā leova. E tatau ona tatou 'alofia na tuatusi.—Salamo 1:1; 26:4; Roma 16:17.

Po o le a E Faia le Finagalo o leova?

Faafetai i le faaaluina o lou taimi e su'esu'e ai lenei polosiua ina ia e iloa ma faamasani i Molimau a leova, ia malamalama e faatatau i a matou galuega ma le faagaoioiga o la matou faalapotopotoga. E matou te faamoemoe o le a fesoasoani lea iā te oe e mātāulia ai, o i matou o loo faia le finagalo o leova i aso nei. E matou te faalaeiau oe ina ia faaauau ona ave i fale le poto i le Atua, ia ta'ū atu i isi o lou aiga ma uō e uiga i mea ua e a'oa'oina, ma auai e lē aunoa ma i matou i a matou sauniga faa-Kerisiano.—Eperu 10:23-25.

O le a e iloaina ai e faapea, o le tele o lou a'oa'oina e uiga iā leova, o le tele fo'i lenā o lou iloa e alofa moni lava o ia iā te oe. O le a uuna'ia ai oe e fai le mea e sili e te mafaia ina ia faaali atu ai lou alofa iā te ia. (1 Ioane 4:8-10, 19) Ae e mafai faapefea ona faaalua lou alofa iā leova i le auala o loo e ola ai? Aiseā e avea ai le usita'i i ana tapulaa tau amio o se mea e sili ona lelei mo oe? Ma o le ā o le a fesoasoani iā te oe ina ia faia ai le finagalo o le Atua faatasi ma i matou? E fiafia lou fai-a'oga o le Tusi Paia e sa'ili faatasi ma oe tali o nei fesili, ina ia mafai ai e oe ma lou aiga ona “faatumau iā te outou i le alofa o le Atua . . . lea e i'u ai i le ola e faavavau.”—luta 21.

E matou te valaaulia ma le māfana oe ia faaauau ona aga'iga'i i luma i le ala o le upu moni, e ala i le sosoo ona su'esu'eina o le lomiga lenei . . .



'IA FAATUMAU IĀ TE OUTOU I LE ALOFA O LE ATUA'

